

Biblioteca Nacional Aruba cu actividad ‘musica ta nos bida’

ORANJESTAD - Diahuebs, 5 di juni ultimo, Biblioteca Nacional Aruba, tabatin su programa semanal, Actividad di Atardi, cu un topico hopi gusta pa grandi y chikito, cual ta musica!

E prome parti tabata na encargo di conocido musico, Chencho Kelly, kende a duna nos chikitinnan un tayer di musica cortico cu instrumentonan di musica en combinacion cu un poco di e historia di Dera Gai.

E segunda parti di e programa, un grupo musical ‘Los Talentosos’ cu ta consisti di hobennan entre 8 pa 20 aña cu a deleita nos muchanan cu canticanan di scol, manera: Chabelita, Ban, ban pasa un rondo y hopi

mas. E muchanan por a canta hunto cu nan door cu tur e canticanan ta canticanan conoci. Baliando manera nan so nan por nan a demostra cu con chikito nan ta nan tambe ta aprecia musica manera un bon Arubiano.

E team di Actividad di Atardi di Biblioteca Nacional Aruba ta probecha e oportunidad pa invita e muchanan diahuebs 12 di juni, di 3 pa 4’or di atardi cu un tayer di pintamento cu lo ta na encargo di e conocido pintor, Robert van Rooijen.

Pa diahuebs 19 di juni nos lo continua cu un actividad di pintamento di cara, cu lo wordo treci pa Annie, un estudiante cu ta bishita nos Biblioteca Nacional Aruba cu frecuencia, y nos por a aprecia su trabao cu ta wordo haci cu hopi dedicacion. □

